

## **AMANDMANI NA PRIJEDLOG ZAKONA O PARLAMENTARNOM NADZORU**

### **AMANDMAN I**

U članu 13. prijedloga Zakona o parlamentarnom nadzoru, iza stava (3) dodaje se novi stav (4), koji glasi:

„(4) Program s rokovima primjene preporuka iz stava (2) ovoga člana, objavljuje se na web stranici revidirane institucije i na web stranici Parlamentarne skupštine BiH.”

### **Obrazloženje**

Prema članu 13. prijedloga Zakona o parlamentarnom nadzoru, koji reguliše nadzor nad provođenjem preporuka Ureda za reviziju institucija BiH, revidirana institucija obavezna je izraditi program s rokovima primjene preporuka Ureda za reviziju u skladu sa svojim nadležnostima. Predloženim amandmanom, u vidu dopune navedenog člana 13., u prijedlog Zakona se uvrštava obaveza javnog objavljivanja programa za provođenje preporuka revidiranih institucija, čime se direktno doprinosi jačanju transparentnosti i odgovornosti u radu kod postupanja po revizorskim preporukama.

### **AMANDMAN II**

U članu 19. prijedloga Zakona o parlamentarnom nadzoru, iza stava (1) dodaju se novi stavovi (2) i (3), koji glase:

„(2) Saslušanje se provodi uvijek u slučajevima ponovljenih pojedinačnih nalaza revizije istog ili sličnog sadržaja najmanje dva puta u posljednje tri godine, prema službenoj evidenciji Ureda za reviziju BiH i komisija za finansije i budžet oba doma Parlamentarne skupštine BiH, te nakon svakog objavljenog izvještaja o reviziji učinka.

(3) Saslušanjem iz stava (2) ovog člana obavezno se saslušavaju odgovorne i ovlaštene osobe nadzirane institucije, u roku od 90 dana od objavljivanja zadnjeg revizorskog izvještaja.”

Dosadašnji stav (2) ovog člana postaje stav (4).

### **Obrazloženje**

Predloženi amandman na prijedlog Zakona o parlamentarnom nadzoru usmjeren je ka jačanju učinkovitosti rada i odgovornosti ovlaštenih i odgovornih osoba u upravljanju datim ovlastima i javnim finansijama. U tom smislu, dopuna člana 19. (Provođenje saslušanja) prijedloga Zakona sa stavovima koji propisuju obavezna saslušanja odgovornih i ovlaštenih

osoba u slučajevima ponovljenih pojedinačnih nalaza revizije istog ili sličnog sadržaja najmanje dva puta u posljednje tri godine, te po svakoj reviziji učinka, za cilj imaju utvrđivanje razloga za ponavljanja nepravilnosti u radu, te odgovornosti za kontinuirano nepostupanje po revizorskim preporukama i zaključcima Parlamentarne skupštine Bosne i Hercegovine.

### **AMANDMAN III**

U članu 23, iza stava (3) dodaje se novi stav (4), koji glasi:

“(4) Izvještaj o saslušanju, zajedno sa zaključcima iz stava (2) ovoga člana, objavljuje se na web stranici Parlamentarne skupštine BiH i na web stranici nadzirane institucije, u skladu sa Zakonom o zaštiti tajnih podataka.”

### **Obrazloženje**

Dopunom člana 23. (Izvještaj o saslušanju) prijedloga Zakona o parlamentarnom nadzoru propisuje se obaveza objavljivanja izvještaja o javnom saslušanju na web stranici Parlamentarne skupštine BiH i web stranici nadzirane institucije, čime se doprinosi transparentnosti aktivnosti provođenja parlamentarnog nadzora.

Predložene dopune usklađene su sa nadležnostima i ovlastima tijela za provođenje parlamentarnog nadzora, prema članovima 9. i 10. prijedloga Zakona o parlamentarnom nadzoru. Odredbe kojima se jača transparentnost provođenja parlamentarnog nadzora predstavljaju i preventivnu zaštitu od eventualnog nezakonitog djelovanja, zloupotrebe položaja i ovlasti, materijalnih i finansijskih resursa, u svim nadziranim institucijama i ostalim, nad kojima se provodi parlamentarni nadzor u skladu sa prijedlogom Zakona.